



# Supruga ratnog zločinca otkrila zaštićenu svjedokinju Pretresen stan Branke Šekarić u Sarajevu

**Policijski službenici SIPA-e pretresli su stan i prostorije koje koristi osumnjičena Branka Šekarić (1976) na području Sarajeva.**

Branka Šekarić je pod istragom Tužilaštva Bosne i Hercegovine zbog sumnje da je kao supruga Dragana Šekarića zv. Pive, optuženog i osuđenog za ratne zločine na području Višegrada, putem društvenih mreža objavila identitet zaštićene svjedokinje u predmetu ratnog zločina, čime je prouzročila opasnost za život i sigurnost svjedokinje i počinila krivično djelo otkrivanje identiteta zaštićenog svjedoka, saopćeno je iz Tužilaštva BiH.

Od osumnjičene će biti izuzet računar, kao i svi predmeti koji se mogu dovesti u vezu s tim krivičnim djelom. Kada je riječ o Branki Šekarić, visokopozicionirani službenik FUP-a Jozo Anđić upozoravao je svojevremeno da je supruga osuđenog ratnog zločinca Branka Šekarić godinama bila član Nezavisnog odbora Parlamenta Federacije Bosne i Hercegovine za izbor i imenovanje direktora federalne policije.

Jozo Anđić je tada optužio direktora Federalne policije Dragana Lukača da je, nakon reizbora na tu dužnost, Branku Šekarić u znak zahvalnosti zaposlio na određeno vrijeme u MUP Federacije Bosne i Hercegovine.

Anđić je tvrdio kako je Lukač pravnicu Šekarić ponudio i stalno zaposlenje, ali je ona, navodno, ponudu odbila jer je dobila drugi posao. Bran-

ka Šekarić je ranije obavljala funkciju ministrice za socijalnu politiku, zdravstvo, raseljena lica i izbjeglice u Vladi BPK.

U februaru prošle godine, predsjednica Udruženja „Žena-žrtva rata“ Bakira Hasečić prosljedila je Tužilaštvu Bosne i Hercegovine kopije uvreda koje je na „njen račun“ uputila Branka Šekarić na društvenim mrežama.

## RATNI ZLOČINI U VIŠEGRADU

### Suprugu 17 godina zatvora

Brankin suprug Dragan Šekarić osuđen je pravomoćno na kaznu od 17 godina zatvora zbog ratnih zločina na području Višegrada, a također, u drugom predmetu u toku mu je suđenje za sudjelovanje u otmici i ubistvu putnika iz voza u stanici Štrpci, u februaru 1993. godine. Zaštićeni svjedok protiv Dragana Šekarića u ljeto 2014. izboden je devet puta u predjelu vrata i srca, i to u svom automobilu na putu kod Goražda.



**ŠEKARIĆ:** Vrijedala na društvenim mrežama